

**Ikhwan A'zim**

Ishak



Timbalan Presiden Majlis Perwakilan Pelajar (MPP), Universiti Kebangsaan Malaysia (UKM)

# Cabaran pegang mandat MPP

**P**eranan ahli Majlis Perwakilan Pelajar (MPP) sebenarnya membabitkan cabaran penuh berliku untuk memahami, mempelajari

dan melaksanakan tugas serta tanggungjawab dipikul.

Namun, setiap liku yang berjaya direntasi bersama pahit manis dan

jatuh bangun sepanjang memegang mandat, secara langsung melakar pengalaman sukar dilupakan.

Bagi menghadapinya,

ahli MPP perlu mempersiapkan diri dengan jiwa kental, idea bernas dan usaha jitu. Mereka akan berdepan dengan permintaan pelajar dan

kerenah birokrasi yang harus ditangani secara holistik bagi memastikan keadaan terus harmoni serta berdiplomasi. Kemampuan mengurus tadbir perkara itu secara berhemah dapat membentuk pemimpin yang berkaliber.

Permintaan pelajar adalah perkara paling dititikberatkan oleh setiap organisasi penuntut di universiti. Perjuangan MPP ialah memastikan kebajikan pelajar terbela.

## Parlimen Mahasiswa

Oleh itu dalam merangka suatu manifesto, aku janji atau penawaran, ahli MPP perlu melakukan kaji selidik dan melampirkan idea, cadangan serta inovasi berseesuaian mengikut kehendak, kemampuan dan situasi.

Adakala, permintaan dikemukakan bersifat kepentingan jangka pendek dan terlalu idealistik, justeru perlu ada pelan jangka panjang yang dirangka berasaskan ilmu pengetahuan serta pengkhususan.

Sebagai contoh di Universiti Kebangsaan Malaysia (UKM), Parlimen Mahasiswa julung kali diadakan bagi memusatkan perbincangan bersama semua badan pelajar yang akan berlangsung dua kali setahun. Sidang parlimen itu mendidik

mahasiswa untuk berhujah secara berhemah serta juga menyampaikan suara melalui saluran lebih berdiplomasi.

## Perubahan besar

Berdasarkan pengalaman saya sebagai ahli MPP, isu kerenah birokrasi sering dibangkitkan oleh kumpulan mahasiswa propembangkang yang menjadikannya modal politik kampus.

Kejayaan barisan MPP Aspirasi pada tahun lalu menyuntik perubahan besar terhadap perkara itu. Tindakan pertama kami ialah menyelidik setiap isu berkaitan kerenah itu. Kebanyakannya disebabkan oleh ketidaksampaian maklumat dan urusan protokol.

Oleh itu, MPP kali ini memudahkan semua urusan berkaitan penyampaian maklumat dan mempercepat urusan protokol bersama pihak pentadbiran universiti.

Sebagai contoh melalui program Jelajah MPP Sekitar Kampus atau Hari Bertemu Pelajar, semua aduan, idea, cadangan dan keluhan pelajar diperoleh serta dibawa kepada pihak yang berkenaan secara baik. Selain itu, MPP juga memanfaatkan saluran media sosial sebagai mekanisme untuk meraih maklumat.



Sidang Parlimen Mahasiswa berlangsung dua kali setahun di UKM.